



TAPAK 10

Wimbledon athiba atema Federer mepelar



TAPAK 3

Tripura CM-itesayur 8,882 nem teyari agütsüba sangdong

VOL. XVII NO. 155 (ADOK 155) DIMAPUR

ROGONÜ (FRIDAY) RONGCHII (APRIL) 03, 2020

5.00

Health worker insurance nung sen lakh 10 tali bendenloksütsü: Rio

Dimapur, Rongchii/April 02 (TYO): Health worker atema Pradhan Mantri Garib Kalyan Yojana nungi sen lakh 50 insurance scheme sangdonger aliba nung ano sen lakh 10 talia inoksemsütsü, ta Nagaland Chief Minister, Neiphiu Rio-i sangdongogo.

Iba insurance ya coronavirus tashidak wara den raraba health professional tem atema lir.

Chief minister-i Twitter ajanga iba osang ya April 2 nü sangdong aser sorkar meyong mozüki aser healthcare center tem nung COVID-19 agi shiranger tem anepaliba mapang health worker temi lendong kar danga ajurura Nagaland sorkari iba sen ya inoksemsütsü, ta ashi.

Central sorkari taküm March ita novel coronavirus den rarab health worker atema iba insurance scheme ya approve süa liasü.

Finance Minister Nirmala Sitharaman-i March 26 nung, coronavirus tashidak wara ketdangsuba nung tejaklen sür

inyakba health worker nem insurance sen lakh 50 agütsütsü, ta sangdonga liasü.

Iba sanding ya Finance minister-i Pradhan Mantri Garib Kalyan nungi sangdongba den yariseмба kalir.

Iba insurance ya 'Safai karamcharis' mesüra sanitation workers, ward-boys, nurses, Accredited Social Health Activist workers, paramedics, technicians, doctors & specialists aser tanga health workers tema atema lir, ta ashir.

COVID-19 agi shiranger anepaluba mapang lendong timtem ajuruba health professional tem nem iba scheme nungi senotsü teyari sen lakh 50 agütsütsü.

Central sorkari agütsüba nung Nagaland sorkari sen lakh 10 inoksemsütsüba ajanga ajak senteper sen lakh 60 akümer.

Iba scheme kübok government health centres, wellness centres aser mozüki ajunga aiter.

April 5 tashi Dimapur district tesashiba alenbanger

Dimapur, April 02 (TYO): Disaster Management Act, 2005 kübok Arrla 30(1) (2) nung aliba tashi amshia Dimapur nung April 1 anepdang 6:00 ako nungi April 3 ayaterm 12:00 ako tashi dokan, shishilembaba tesem aser nija establishments ajak shibangtsü atema March 31, 2020 nü sangdonga liasü; ajidoa COVID-19 prokba nokdangtsü atema maneni kasa tetuyuba ya atsülanga April 3 ayaterm nungi April 5 ayaterm tashi dokan, shishilembaba tesem aser nija establishments ajak shibangtsü tuyur, ta Brihostibarnü Dimapur DC, Anoop Khinchi, IAS-i sangdong ka ajanga metetdaksüogö.

Iba tetuyuba ya Dimapur District tesem ajak nung benshitsu. Ajisüaka iba tenokdangba kübok Police/Army/Para-military forces/Magistrate on

duty/nija hospitals aser clinics densema Doctors & Medical staffs, Medicines Whole sellers & Retail Pharmacies, Bank Staff aser emergency services dak sendakba nisungtembo madener ta sangdong nung shia lir.

Iba tenokdangba mapang nung nisung kari dang aibelenra Disaster Management Act, 2005 kübok Arrla 51 nungi 60 aser IPC Arrla 188 kübok temerenshi agütsütsü.

Rongdak nungdak atema public-i teküboklen aliba contact nung tongteprateptsü akok:

1. Ambulance aser mozüki atema - 8787551751
2. DC Office control room - 6009924366
3. Police control room - 7085055050
4. Medical control room - 7630877991 / 7630877983

AO SÜNAK ABENER AJAK DANGI AO SENDEN, WATSÜ MUNG DANG ASER AKM-I AYIMOKTSÜR

Tanü alima ajunga nung WHO ajanga pandemic sangdonga aliba wara tashidak COVID-19 nokdangtsü aser asen Naga lima-a iba wara nungi kümzüka alitsü atema Nagaland Sorkari koba nübur asoshi teinyaktsü tetuyubatem metetdaksa temzüngözüng lateta sangdongogo, item temzüng özüng den külemi Ao Sünak abener kija aser lokti ajak dangi item temetetsütem aser tekümdangtsü ayimoktsür.

1. Nebur kar danga anempongsü nungdaka lira tekeratiba nung Medical Help Line den tongteprateptsüla. District telongtet nung "Quarantine facility" lapoka aliba tesemtem nung Yimden, lokti aser kija shingai timtem magutsütsü metetdaksür.
2. Nagaland sorkar ajanga yimtsüng ajak nung VDB nem COVID-19 atema Sen o tsü teyari kobasa aguja ali, ibaji mejamejaa iba tashidak wara atema nokdakba tongpang nungdang amshitsu metetdaksür. Yimtsüng ajaki ajongben kodamasü nung shiranger nisung semer(30)bosa mejangtetsüsa kiojen renema atatsü metetdaksür.
3. Iba wara tongpang nung nokdakdang Aor senso kar danga bendanglima tasütama ajurura, nübur ajak kümzüka ayutsü tangatetba tulu yur, dang tensa nung tasü mang pei taso yimi bener maru tajungba asütsü.
4. Mkg. District Administration ajanga koba temzüng özüngsa lateta agutsür item temzüng kübok nebur ajaki tashi angaa anidaktsü metetdaksür.

Sd/-

Chubawati Longchar, President, Ao Senden
Maongenla, President, Watsü Mungdang
Nungdokyanger Pongen, President, AKM

Neiba Kronu-i Nagaland nung COVID-19 indang lemsatep



Dimapur, Rongchii/April 02 (TYO): Linük nung coronavirus tashidak wara indang tensa asadangtsü asoshi Ato Kilonser Narendra Modi-i April 2, 2020 nü Chief Minister ajak den Video Conference ajanga senden mena liasü, ta Neiba Kronu-i sangdong ka ajanga ashi.

Iba senden nung Nagaland Chief Minister aden, kong linük ajunga shibangba sentong takok angutsü asoshi maparen kanga junga inyaktsü indang Ato Kilonseri jembia aser iba virus prokshiba nokdangtetsü asoshi temulung melemi aliba nisungtem bushiteta, tangar nungi pilaa ayutsüba aser quarantine maparen atema nenshia jembia.

Kasa senden nung state ajungai nungdakba medical osettem tekeratiba nung bendentsü indang jembia aser COVID-19 Hospital balaka alitsüba nungdakba indanga süoka jembia liasü.

Ato Kilonser den iba video conference aliba sülen Nagaland Chief Minister-i state kübok District 11 indang DC/SP aser CMO den Video Conference agia liasü, kong district shia iba COVID-19 tashidak wara nungi kümzüka alitsü asoshi renemshiba indang osang tejangja agitep.

Iba senden nung CMO temi Chief Minister dang mozüki yanglushiba, Medical Equipment tem aliba aser tanga osettsüsettem indang metetdaksü.

CM-i district ajak nung ketdangsertem dang tensa kanga junga mita alitsü aser tensa aziüktsü asoshi tapet mera agitsü indang ashi.

Krono-isa ashiba agi, maneni April 2, 2020 nü Department of Health & Family Welfare nungi Principal Director, Dr. Vizolie Z Suokhrie-i anir telok kati Mon, Longleng aser Tuensang district tem semdanga COVID-19 quarantine facilities aser mozüki

tem semdang. Parnokisa district administration aser district health ketdangsertem den sensaksem kaa liasü.

Nagaland nungi New Delhi nung Nizamuddin Markaj tamangba yimsü lokti senden nung dener alitsü akok mesüra iba tesem anasai oa alitsü akok ta temulung melemi aliba nisung 48 den tang tashi osang magiteter aser item rongnung par 20 Nagaland nung mali, ta Kronu-isa ashi.

Tanüngba parnok 28 rongnungi nisung ana dang iba senden nung aden aser parnok quarantine facility nung yua lir. Iba nisung ana dak nungi sample agizüka tendangtsü asoshi bener yok aser tena dak coronavirus mali ta bushitet. Tanüngba nisungtem yabo iba lokti adenshiba tesem anasai aoba mesüra iba tesem ajanga aoba dang lir aser parnok ya home quarantine nung lir aser parnok kata dak iba wara indang symptom mali, ta paisa ashi,

April 2, 2020 nü nikongdang 4:00 ako tashinung COVID-19 tashidak wara tendangtsü asoshi sample 40 yokba nungi sample 32 nung iba virus mali, ta osang nguogo aser tanüngba sample ti indang result ataba mapang lir.

Yashi Delhi nungi medical osettem Indian Airlines ajanga Guwahati tashi bener arutsüba Kohima tongogo, ta paisa shia liasü.

Metokmepri jenti liaka Covid-19 den raratsü IMDH renema lir

Mokokchung, April 2 (TYO): Tesem aika nung metokmepri liakasa Covid-19 tashitak den raratsü onok renema dang lir, ta Mokokchung Imkongliba Memorial District Hospital (IMDH) ketdangsertem den iba osangbeneri jembidang parnoki metetdaksü.

IMDH nung Covid-19 dak sentakba nung terenemshiba (Mock Drill) maparena anaben tashi agiogo, ta parnokisa ashi.

Tangji shiranger tem anepaludang tashitak mementsü atema asemba PPE kar den mozümora aser hand sanitizer ishika onok ket tongogo, saka PPE ya khen agirbo tanaben magiteter asünung, tang aliba yagibo meperitsü, iyongji, IMDH-i parnok jurila nungdakba osettem kar tangalen nungi order süa lir aser itemji karbo tongogo aser ano kar matong lir, ta

parnokisa ashi. Covid-19 agi shiranger tem anepalutsü atemaji tang onok ket nung aliba osettem yagi meperitsü, ano iba dak sentakba nung tanga tongtibang osettsüset kar den nübu nungdaker, ta parnokisa shisem.

Mokokchung nung Covid-19 hospital balaka mesemtsü asoshi sorkar nungi tetuyuba ka aru, anungji, tang Mokokchung T.B Hospital alibaji tesütep tesem ka asünung, ibaji Covid-19 hospital asütsü mesemeter liasü aser timtem aika liaka T.B Hospital-ji khen atema IMDH Isolation Ward kati belendaktsüogö.

Iba ama renemshiba mapang ka nung, ano sorkar nungi IMDH-ji Covid-19 hospital akümsü tetuyuba ka arua lir, aser April 6, 2020 nungibo tetuyuba tasen ka magütsü tashi shiranger tasen kata admit masütsü. Iba den ano tang mozükidang munga

alirtemjia April 6 tashi nungbo Lenjem Hospital-i belentsüla aser emergency case dak alaka IMDH nungji shiranger shinga mereprangtsü. Iba tetuyuba tasenba yagi IMDH ketdangsertem aser doctor-temji tera ratamataba tia ka nung lir, ta osang ajanga angazüker.

"Lenjem hospital nungji doctor tejang ka dang lir, süra tang kanga mejungi shiranga alirtem aser shiranga arurtem (OPT)-ji shirnoki repringtsü?", ta doctor kati iba osangbener dang ashi. "Kohima aser Dimapur den medemdangla masü kechiyong idakjibo private doctor-tem peria lir, anungji, nungdakba mapang parnok teyariji agitetsü saka Mokokchung nungbo yamaji masü, doctor kanga apara", ta paisa timtem kar lemsatep.

(Maneni tapak 2 nung...)

Mkg dist admin aser MTBA nati koda masürtem chiyungdaksür

Mkg, April 2 (TYO): Mokokchung district Administration aser Mokokchung Town Baptist Arogo (MTBA) nati koda masür chiyungtsü mangurtem atema angati chiyungdaksüba mission mapa ka "Community Kitchen" ta sür April 2 nungi tenzükgö aser mezüng anogo nisung noklang ka shii iba maongkaji agia shilem agia liasü,

ta osang ajanga angazüker.

Iba Community Kitchen ya MTBA tenla kima lapoker aser ibai tongtibangsa mapa balala inyakertem iba lockdown ajanga pei alidak mouteti alir koda masürtem, tangalen nungi arua ayangertem, hajira wala aser shirnoksa chiyungtsü nungdaka yaa tzüra lir, itemji anitena angati chiyungdaksür.

Asen kidanger aser kiyonger kar danga koda masüba tia nung timtema lira parnok nemji osang agüja item mobile number (8837310159/9436439033/9774616981) nung tongtepratepa iba teyariji agitetsü akok. Iba mapa ya lockdown matem tashi aotsü aser community kitchen-ji anepdang 11:00 nungi nikong 1:00 ako tashi lapoker.

Y Patton-i Wokha district COVID-19 mozüki semdang



Dimapur, Rongchii/April 2 (TYO): Deputy Chief Minister aser home and road & bridges incharge Y Patton, MLA Advisor for Horticulture & Border Affairs Mhathung Yanthan den Local MLA Dr. Chumben Murry aser district administration ketdangsertemi Dr. Motsuo Memorial District Hospital, Wokha Covid-19 Hospital, GHSS-Quarantine Ward, Christian Medical Centre, Vankhosung semdangogo.

Mozükitem semdangba mapang Wokha district COVID-19 MLA incharge Y. Patton-i Wokha district nung Covid-19 azüoktsü asoshi renemshibatem aser tensa asadangogo aser Chief Medical Officer aser Doctors o staff tem den state mokdanga aliba mapang tashidak prokshia meyoktsü asoshi jenjang tapet agitsü atema sensaksemogo.

Dy. Chief Minister Y Patton aser MLA & Advisor, Mhathung Yanthan den local MLA Dr. Chumben Murry nung district administration, police aser health worker tem

den DC conference hall, Wokha nung senden ka menogo. Senden nung Dy. Cmi, tashidak den raratsü asoshi health worker tem tenüngdak osettem agi anüngba densema tanga tetsükdaktsü ajuruba tem indang angadangogo. Ken o angdangba sülen jenjang tapet agitsü asoshi state sorkar dangi item ken o tem abentsü ta Patton-i shiogo.

Maneni District Administration, Police, Medical Department aser osangbenertem renema aliba ngua parnok nem tenüngsang agütsüba den Covid-19 tashidak prokshia meyoktsü asoshi nüburtem ajak atema bendanga agüja inyakba atema parnok nem, pai tenüngsang agütsü. Patton-isa, allied department tem aser yakbang nung inyakertem dang nüburtem taküm kümzüksü asoshi tebandang makai inyaktsü mepeshi.

Senden amenba sülen Dy. CM-i, district Administration nem tang tenüngdakba peridaktsüsü asoshi face mask 4000, hand sanitizers 1500 shi

asem sen tenla agütsü. Patton-isa, sorkari takaratiba nung protective gears tem lemstsüsü ta nangzük.

Iba rara ya ajak ajangzüksü asoshi lir ta shia pai nübutem dang iba tashidak nungi pei taküm kümzüka alitsü asoshi kidang nungi madoktsü aser lokti nung tetsüngda ita inyaksangshiba den sorkar tetuyuba sülen tashi angaa anidaktsü mepeshi. Maneni pai, nüburtem dang olulu osang prokshiba nungi pilaa alitsü mepeshi aser ashiba agi, Centre sorkar aser department of health and family welfare-i COVID-19 dak sendakba nung osang tejangja metetdakja alitsü, ta ashi.

Deputy Chief Minister Y. Patton-i mapang shidak nung district semdangba aser tenla tajung agütsüba atema Deputy Commissioner Wokha aser district HoDs ajaki pa nem tenüngsang agütsüba den Wokha District nung aliba nüburtem atema pai mejeta inyakba ajanga parnok ajungmesoba atema pelaba lemsatsep.

NIA-i NSCN (IM) züngsem ka anema chargesheet talila benok

Itanagar, April 2 (Agencies): Arunachal Pradesh nung MLA ka den nisung 10 tepsetba ken o atema National Investigation Agency (NIA)-i NSCN (IM) züngsem Ellie Ketok anema supplementary chargesheet ka benokogo.

"NSCN (IM) Major General Rockwang Tangkhul den Luckin Mashangva, Yangte Josaham, Nepong Jenpi, Ellie

Ketok aser tanga NSCN (IM) züngsem kari iba mapa inyaktsü atema telok ka kümteter tasa atong. Iba telok nem Jai Kishan Sharma-i senotsü teyari agütsü" ta NIA-i metetdaktsü.

"NSCN (IM) indang telok yagi taoba mapang MLA, Khonsa aser pa pusemertem amokmerena liasü, kechiyong parnoki NSCN (IM)-i inyakba maparen anema noktak. Iba

nung ajemdaker yaküm May 21 nü NSCN (IM) züngsemtemi Khonsa MLA Tirong'er convoy amak aser idangji MLA dena nisung 11 khaset aser asem yirusü" ta NIA-isa metetdaktsü.

Iba dak sendakba nung January 27 nü Luckin Mashangva, Jai Kishan Sharma, Yangte Josaham aser Napong Jenpi anema chargesheet ka benok, ta parnokisa shisem.



Medziphema Town nung aliba ward 9 prong nem MLA Zhaleo Rio, IAS (Retd.), Advisor, Sericulture, Excise & Minority Affairs, GoN ajanga hand sanitizer aser face mask agüja liasü. "Tesem ajanga nung item osettem kanga anünga lir, aser item oset lema agütsüba yagi nübur ajak meperitsü saka makamaitertem yaritsü," ta iba oset agütsüsü nungloktüsang aser NDPP 5 Ghaspani-II A/ C tir Dosau Kuotsu-i ashi.

Wameken Mejensanger Putu ajanga pelaba lemsateper

Dimapur, Rongchii/April 02 (TYO): Linuk tesem ajak shibanger nüburtem chiyongtsü nung timtema aliba mapang, nübur lenir Wb. L Temjen Jamir (Ex. MLA) Director, Wameken valley tea producers co. Ltd. aser Kamal Jalan, Director, Lenda tea factory, Wameken Valley ajanga yimer ajak nem jang, süngojok, totzü aser hand sanitizer lema agütsüba asoshi ozü Wameken Mejensanger

Putu mendeni kanga pelar, ta sangdong ka ajanga metetdaktsü. Mapang shia yimer nüngdakba maparen balala nung teyari agüja aruba asoshi Putu Mendeni lenir dak kanga temolung achir. Tsüngremi parnok taküm aser maparen nung tali mojangma, ta Chairman, Wameken Village Council ajanga sangdong nung ashi.

Kaketshirtem nem teyari agütsüsü

Dimapur, Rongchii/April 2 (TYO): State ajanga mokdang aliba ajanga jila balala nung hostel aser para ki nung alir kaketshirtem chiyongtsü aser senotsü agi anüngba osang angazükogo, ta Chief Secretary, Nagaland Temjen Toy-i sangdong ka ajanga metetdaktsü.

Deputy Commissioner ajaki item kaketshirtem nem takokba tashi teyari agütsüsü tettsü. Teyari agütsüba kaketshirtem indang list ya Principal Director, School Education Dept. Nagaland Shanavas (Mobile No. 8732893116) nem metetdaktsüsü, ta kasa sangdong ajanga metetdaktsü.

Youth Hostel nung 173rd CRPF ajanga temang tendang



173rd CRPF Battalion Dimapur ajanga Youth Hostel Dimapur nung April 2, 2020 nü medical check up agiba noksa nung angur.

Dimapur, Rongchii/April 02 (TYO): 173rd CRPF Battalion Dimapur nungi medical team kaketshirtem ajak temang tendang aser kar gastric aser tepok moroba dak alaka ajak temang junga dang lir, ta ashi. Parnok nem sanitizer, dettol, hand wash aser sapon tem den mozü angadi agütsü.

Dr. Kumar Sankar Verma-i aniba medical team yagi kaketshirtem ajak temang tendang aser kar gastric aser tepok moroba dak alaka ajak temang junga dang lir, ta ashi. Parnok nem sanitizer, dettol, hand wash aser sapon tem den mozü angadi agütsü.

Metokmepri jenti liaka... (TAPAK 1 NUNGI...)

"Doctor-temji anogo lemsar duty melentepa inyaktsü aser melentepba mapang duty inyaka alirtemji anogo 14 bo tesem balakati belener quarantine nung ayutsü, iba mapang nungji nübu apara asünung, tang shiranga alirtem aser emergency case arurtemji shirnoki reprangtsü?" ta parnokisa terataba kar lemsatsep.

yangji Covid-19 shirangertem anepalutettsüsa nungdakbatem abensaa mali aser IMDH-ji Covid-19 hospital asütsü belenyonga yangjia nungdakbatemji peria mali, saka kodang IMDH-ji Covid-19 hospital kümdir, tang shiranga alirtem aser emergency case arurtem atema tebilemstü tulu ka asütsü, kechiyong tang IMDH nung inyaka aliba maparentemji kecha meinyaktettsü, ta osang angazüker. Tia junga tang tashibo IMDH nungi iba tatishitak dak sentakba nung testing atema yokba aser temulung melemteti bilemba kata arua mali.

Tang IMDH nung ya doctor ajak senteper 14 lir aser nurse 60 shi lir. Tangji IMDH nung shiranga amunger parnok 20 shi lir. Item rongnung koda masürtema densema lir, anungji, tangalen belen nungbo talisa cancer agi shirangertemji timtem tulu ajurutsü akok, ta doctor-temi arendaka bilemer.

IMDH atema telok shirnokisa mapa tajung inyaka tenla tulu agütsüdaki, item lokti tentet ajak dang IMDH ketdangsürtemi kanga pelaba lemsatapa liasü.

Mokokchung nung T.B Hospital tang koba Covid-19 hospital mesema lir, yangji nisung 50 tashibo yutettsü saka

Arunachal nung COVID-19 tashidak aketer mezüngbuba putetogo



Itanagar, Rongchii/April 02 (Agencies): Nizamuddin Anüdoklen, Delhi kübok tawa agiba sentong nung adener arishi küm 31 tain tebur ka dak Brehostibarnü Lohit district nung coronavirus tashidak keta aliba tejangja putetogo, koba Arunachal nung COVID-19 wara tendangtetba mezüng asütsü, ta health ketdangsertemi ashi.

Iba nisungba ya Lohit distrit kübok Medo tesem nungi lir aser pa indang sample tendangtsü asoshi Regional Medical Research Centre (RMRC), Dibrugarh, Assam-i yok, kong sample nung

COVID-19 tendangtetba tejangja osang metetdaksü, ta Health Secretary Pratibhan-i ashi.

March 13, 2020 nü Nizamuddin kübok Tablighi Jamaat sentong nung iba nisungba ya dena liasü, ta ketdangsertemi ashi.

Iba patient ya Tezu Zonel Hospital nung takdang balaka nung yua lir aser iba den külemi par adianutem-a quarantine facility nung yua lir, ta Prathiban-i ashi.

Tebursang'er adianutem indang swab sample tem bendentsü aser tendangtsü atema yoktsü, ta Prathiban-i

shisem.

Ano Tablighi Jamaat sentong nung adener tem parnok nisung trok shi Namsai district nungi liasü aser parnok dak Covid-19 tashidak meputet, ta State Surveillance Officer (Integrated Disease Surveillance Programme) L Jampa-i ashi.

Iba sentong nung adenba sülen, March 18, 2020 nü tebursang ya pa alidak Medo tesem tonga aru. March 16, 2020 nü pai Nizamuddin toktsür pa talidak bushia aru aser March 24 nü nungi par kidang pa quarantine süa ayu aser anogo 16 sülena pa dak coronavirus tashidak keta aliba

temaitsü kecha mesayui liasü," ta ketdangsertemi ashi.

Tang Arunachal Pradesh nung tashidak puteter alisang den külemi senzürtem/pa den ajuruteperitem bushitsü asoshi police-i maparen tenzükogo, ta Lohit district SP Wangdi Thungon-i ashi.

Arunachal Pradesh nungi sample 58 tashi tendangtsü atema yokogo aser Bodbarnü tashi nung item sample nungi sample 38 negative tendangtetba osang tejangja angazükogo, ta Jampa-i ashi. bond nung ajemdaker chiokba liasü.

"Supreme Court-i tuyuba ama iba mapa atema luden ka tentet aser parnoki ashiba nung ajemdaker tepuokdak ayurtem chiokogo," ta Inspector General (Prison) of Assam Dasharath Das-i ashi.

Iba mapa ya Honibar nungi tenzük aser ludeni iba mapa ketdangsüa repranger, ta IG (Prison)-isa ashi.

Assam nung tepuokdak 31 lir aser nisung 8,000 tashi puoka lir, ta osang ajanga ashi.

Bodbarnü Shillong District Jail nungia Under Trial Prisoners (UTPs) 94 tashi chiokogo.

Parnok ya emergency parole nung chiok aser tanga district nunga Legal Aid counsel teyari ajanga District Legal Services Authority ketdangsüba kübok tepuokdak ayurtem chioktsü.

"COVID-19 wara adokba sülen tepuokdak ayurtem tajemba kümdaktsütsü atema state sorkari sentong kar atongdar" ta Meghalaya Deputy Chief Minister, Prestone Tynsong-i ashiba sülen anogo ka lir iba mapa ya inyak tenzükogo.

Shillong District Jail nung ayur nisung 174 tashi chioktsü atema tenüng shimtet aser parnok jungjunga asadangba sülen 94 chiok" ta tanü state sorkar sangdong ka nung metetdaksü.

Ano, Social Welfare Department-ia ashiba agi Mawkasiang, Shillong nung aliba observation home (Boys) nungi tanur 8 chiokogo.

Supreme Court-i tuyuba ama Meghalaya High Court judge, Justice H.S. Thangkhiew menden ser High Powered Committee ka tentet.

Iba luden nung Commissioner & Secretary Prison aser Inspector General of Prison na züngsema lir.

Arunachal-i ayangertem nem sen 2,000 agütsütsü

Itanagar, Rongchii/April 02 (Agencies): Arunachal Pradesh Building aser tanga Construction Workers Welfare Board (APB&CWB) nung züngoksema alir non-government/unorganized worker shia nem Arunachal Pradesh sorkari ita ana atema sen 2000 (meyi anana) agütsütsü asoshi telemtetba agiogo.

Alima ajunga asüngba wara COVID-19 azüoktsü asoshi linük nunga anogo 21 tashi maparen ajak shibangtsür aliba mapang ka nung, Sorkari iba ama mapatong tajung asatetba ajanga Arunachal Pradesh state indang unorganized sector kübok kisüjensü mapa inyaker nisung meyisa meyi nem teyari agütsütsü.

Mongolbar nikongtsütsü,

APB&CWB secretary-i agütsüba tetuyuba ka ajanga angazükba agi, register sür alir non-government/unorganized worker tem shirnok board nung zünoksema lir, parnok nem cash relief ama April aser May 2020 atema sen 2000 (nisungshia) agütsütsü.

Tang amala mapang lokti nung kanga timtema alirtem nem teyari agütsütsü atema APB&CWB mendenbuba Jalley Sonam-i maparen achaayanga inyakba ngua Chief Minister Pema Khandu-i pelaba metetdakja liasü. Kasa mapang, coronavirus wara den raratsü atema Bodbarnü Arunachal atema osettsüsettem tonga aruogo.

Bodbarnü, Hindon Air Force Station, Uttar Pradesh nungi Dibrugarh Airport tashi tayimtsü ajanga yokba oset balala tonne 5.5 nung nija amshitsüba osettem; masks, sanitizers aser medical dak sendakba tanga osettsüset aika dena liasü.

Bodbar nikongdang 2:00 ako meta Dibrugarh airport nung iba tayimtsü anenzükba sülen, Naharlagun aser Itanagar atema osettem helicopter ajanga bener yok.

Kasa mapang item oset ya Tezu, Namsai aser Roing tesemtem atema pei tata shilem lenzüktsür yoka liasü. Helicopter yagi oset ajak bener motetbayong, oset karbo Dibrugarh airport nung yuja liasü aser item mozü ya Brehostibarnü gari lenmang ajanga Naharlagun-i bener yokogo.

Tripura CM-i tesayur 8,882 nem teyari agütsüba sangdong



Agartala, Rongchii/April 2 (Agencies): Tripura chief minister Biplab Kumar Deb-i Bodhbarnü ad-hoc tesayur 8,882 nem teyari ama khen atema sen 35,000 (nisungshi) agütsütsü sangdongogo, shirnok Mongolbarnü mapa nungi anenja liasü.

Video osang ka ajanga chief minister-i, tang amala tensa majungba mapang ad-hoc tesayur 8,882 shirnok mapa nungi aginogo, parnok nem sen 35,000 (nisungshi) agütsütsü, ta ashi.

"Cabinet-i tesayurtem nem senotsü teyari agütsütsü telemtetba agiogo. Parnok 4,375 shi itasen 14,078, tesayur 3,761 shi sen 28,995 aser parnok 746 itasen 35,594 nguya liasü. Sorkari iba senotsü teyari agütsüba ajanga item kibongtem ajangzüktsü imlar," ta Deb-i ashi.

Mongolbarnü mapa nungi magin tsüngda itasen ngua aliba toktsür parnok ajak nem state sorkari sen 35,000 (nisungshia) agütsütsü.

"Lok Sabha elections matong tsüngda onoki humanitarian ground nung tesayur 10,323 indang

tebilemstü bentettsü asoshi takokba tashi inyaktsü ta nangzükogo. Onoki tenangzükba yuogo; onoki nenok mapa küm ana tashi atsülangtsütsü asoshi mepeshia liasü," ta Deb-i ashi.

2010 küm tashi nung mapang balala nung graduate, postgraduate aser undergraduate tesayur mapa balala nung tesayur 10,323 shimok. Iba sülen tesayur shimba yimya ashishia ken o ka benok aser okadak ajanga tesayurtem shimba yimya ya ozüng alema inyak ta shia tesayur 10,323 mapang nungi anentsü.

Tesayur 10,323 nungi parnok 1,439- bo tanga mapa nguogo aser tesayur ana süogo.

Maneni iba ken o indang jembidang chief minister-i, state sorkari tesayur 10,323 indang ken o angadangtsü asoshi Supreme Court nung online application ka benokogo, ta ashi.

"Onoki online interlocutory application ka Supreme Court nung benokogo. Okadak ajanga iba tebilemstü bentettsü asoshi takaratiba nung obendang agütsütsü imlar," ta Deb-i ashi.



Imphal, Rongchii/April 02, 2020: Medical team-i nisung ka dang asüngdangyaba yangi angur. Tang Manipur nung nisung ka dak coronavirus tejangja tendangtetba sülen state nung iba tashidak puteter nisung ana akümba sangdongogo. Delhi kübok Anüolen Nizamuddin tesem nung March 1 nungi tenzuka March 15, 2020 tashi ayongzükba Tablighi Jamaat sentong nung iba nisung (Manipur nung COVID-19 puteter tanabuba) dena liasü, ta Manipur Chief Minister N Biren Singh-i Brehostibarnü metetdaksü. Singh-i ashiba agi, tang nisung ishika quarantine centre nung anepaludar.



TIR YIMYIM YIMOBILEM (EDITORIAL)

DIMAPUR ROGONÜ, RONGCHII (APRIL) 03, 2020

Mozüki yanglushiba mapang

Tanga state-tem nungbo küm shia senotsü sentong yangludang department aika rongnung tenüngdaktiba department ka agiteta tali temulung tagütsüba inyaksü atema senotsü tali lezmüksür. Tatishitsü agi, Dehi nung Amm Aadmi Party (AAP) government-i department ajak rongnung Education department nem sen teimba lezmükja repringtsü asoshi mulungtet. Anungji, parnoki 2015 küm asoshi senotsü sentong yangluba mapang, Education department nembo budget nung enokba sen noklang nung shilem 26 (26%) lezmüksü. Tetezü state government kübok tanga tanüngba department-tembo tanüngba sen 74% agi dang lemsatsü. Iba sen jagi education ministeri anir Delhi nung government school-tem nung ketdangsuba yimya nungi tenzüker kiojen aser sayuyim ajak tajungba küma yanglushiba ajanga khen nung temelenshi tulu adok. Aji oda, tangbo Delhi nung US tir aruba mapang dena pa kinungtsü dang nümadanga sayutsüba tesemtem rongnung Delhi government primary school-tem liasü. Iba denji AAP government-i light aser tzu jenjang dalangba agi shitak agütsütsü tenzüker. Iba amaji kidang kibong nung asenoka koba tama aser koba tesü inyaksü meteta inyak ama, government nunga koba tama aser kobabo tesü inyaksü meteta, iba yari senotsü lezmüksüra, koba department südir süaka inyakmong metetmeteta inyaksü. Tesasatsüka, asenok state nungbo küm tasen tenzüker shia senotsü sentong yangludang, koba department asoshisa sen teimba nungdaksü ta bilema masü saka akok tashi kasasa lemsatsü merangba angur. Atangji, timtem kaji asenokbo asenoksasa bener aruba sen agi mapa ka inyaksüsa masü, anungji Delhi nungi aruba sen agidang tagu apia lemsatsütsü meranger. Iba ji ita sen asoshi lemsatsürbo terenlok mapa inyaksü asoshi teraka dang anünger. Ajisüaka, iba timtem kija dangji atongtsüa mali, kechiyong asenok dak koba tama aser koba tesü inyaksü ta asüba bilemdangtsüba shisatsüji aiben marur. Tanü ama mapang ka nung, tang alima nung tashidak wara tamajung agi amokmerenba mapang ya, government senpong nung akaba dang masü saka kija, kibong aser lokti arogoi tenlaba dena mozü kidang nungdaksüba nung amshitsü asoshi agütsüba yagi 2020 küm yabo mozü ki yanglushiba küm amai lasasa kümadokogo. Iba mapang ya tesem aika nung mozü ki kodanga moukdang aliba okdoka merüktetsü, yipten aser mendentem merang ponger yusaa orr alibatema tasen küma yanglushitsü, yipten shia yipten sü ajak teronem menema lema akatsü, shirangertem asoshi mozü aser chiyongtsü shitak angutsü, mozü kidang blood pressure tendangba oset nungi tenzüka tango mesapu aيتدang oxygen dena agütsütetsüsa renemtsü. Mozü ki ka nung anepalutsüla purtem shirnoksa alitsü tim, item tenük, tebu, poknungpokra, tetsür repringba doctor-tem den temang dena wapoka repringtetba doctortem den nurse aser inyakertem ajak alitsü. Mozü ki kima aser kilong ajak topur junga akümtsü aser inyakertem aliba agi kodanga mazungtsü. Lendong timtem sülen temoatsü mapang arur ta jembiba amato, tang asenok atema tashidak wara agi aleper arutsüba temoatsütemji itemji asütsü. Asen lima nung dang masü saka linük ajaklen mezungbo government kaketreju aser mozü kitemsa tajungba liasü saka kodang private school aser private hospital lapokdaksüyonga ao, kechi komakaser, government school aser government mozü kitem mejungi küma adok. Iba jagi asen tsürabur aser chirnurtem aika, makamaitba agi, arishia alitsüba ser nung mozü ka malitetba agi mesüra operation tilaka magitetba agi temeimtsüka aser tesasatsüka anojungi alima nungi pilaogo aser tajung akümtsü pur chirnur aika school mezungtet taküm raksadaksüogo. Itemji bilemteta, tang ya asenok taküm aser mapa tajungba küma melenshir pei nübertem meima inyaksü asentenshiba mapang ka sudaksüdi.

OLEMSABANG

ALIMA TEMENEN MAPATEM AJANGA PUTU PALALA NUNG TSÜNGREM JASHIDAKTSÜR

- K Lima Longkumer, Chumukedima

(Yashi adok nungi...)

Putu palala nung nisung tenüng tütta shirnokisa tekangshi tensa ajurugo, tanü 2020 putu nung NOVEL CORONA VIRUS wara agi asenok alirtemi ya ajurua lir tanü alirtemi ya tia maka nüpurtem ta ashitsü mapang, saka iba wara ajanga alima nung aliba nüpur ajaki Tsüngrem dang lumia sarasademtsü mapang tajung pentsüogo ta shidi.

Putu aika China lima ya communist imsü amangertem, parnok tamaren lima akümba agi parnoki tanga imsü kanga mezungmeshir, parnoki Christian aeka reshikangshidaki aser aeka tepsettogo, tanü par lima nungi NCV tashidak poktet aser iba tashidak agi alimang süngugo, nisung aeka sügo, aeka dak kongshia lir aser mekongshir tarakzü majung temulongjang tenna kokroker litepdaki. Linük ajungai la dang jashir.

Alima tashe apünertemi ozüng aeka yangluogo iba jagi tashi mangar alentsü, PM-i India nung ajak timtemer atema sen crore aeka sanctioned agütsügo, ano asen state CM-i Govt. tenzüker ajak CM fund taser künü taa akanger saka iba tashidak yabo sen agi manüptsü, saka Tsüngrem tashi ajanga tang akoktsü aser Nagaland for 'Christ state nung alirtemi Tsüngrem dang akangtsüba ajak agi alim; hon dang nungibo Yisu-ang shimdi "ta tasü itta shidi. America-i alima asoshi sen aika tenlaogo, India PM-i a sen crore aeka tenlaogo ano tang dang nungi timba sanctioned süang ta ashinunga PM-i hai ta nangzüksü, saka iba sen jagi timtemerbo tiyari angutsü saka sen agi iba tashidakbo manepsü. Ano Naga nunggerbo iba sen alozükka akitsü tetemsü nüba aekba lir.

Tsüngrem o-i asenok dang ashiba dangi ken meyipdi.

Isaia 24:1 nungi 23 tashi ojang kada müzüdoki züngdi.

5. ali nung alirtemi alima menentsür

6. anungji ataktemi alima meyoker

7. Pelashishia alir ajak shesa atemer.

11. sasa pelar ajak shemaka lir, linük nung menüremtepba samaogo.

17. tetsübuttsü kangla aser sang nü madak lir, oh alima nung alir nisungtem!

18. Aser shiba tetsübuttsü ola nungi jendir kangla nung tsüksü; shiba kangla telong nungi adokdir sang nung aputsü;

21. iba anugo nung ya ataloktsü, oda kibubai temalen talang nung aliba temeranger aser alima chubatem merenshitsü.

Isia 26:20-21. Arung kü nübur, na nü taktangi iang, aser nü madang kishi ayubangang. Ain adokba süia mao tashi nü sasa kungpiga adokdaksütsü, aser joko pai tepsetba mimiimtsü, kechiaser bi talidak nungi adoktsü aser alima nung alir ajak parnok tai yari merenshitsü. Alim-i aji arutaki aser shirnok tepsetogo parnokji alimai joko memetetsü.

Jerimiah 16:4: Tasütsü tashidak tulu agi parnok asütsü. parnok mang mayitsü, mesüra parnok maremtsü, parnok ali tema nung jana ama alitsü. Nok agi aser ayawara agi parnok samatsü aser tasü mangji anüng ohzü aser arem shiruru asoshi chiyangtsü alitsü.

Aji oda Italy nungbo nisung aremdak maka kümogo ta angashir (Latest news)

(My heart cries. This is the army in Italy. Not going to war, but carry dead bodies)

Tang tanak nisung anadi mejemba khen. Tesüngmangtsü koa jeppa khün atenba net nung angu.

CORONA VIRUS -SONG OF HOPE

If we pray together you and I
And put our nations to God
The holy spirit will come down
And heal us from COVID-19
Corona virus can be treated
Our scientists will find the solution
The holy spirit will come down
And inspire our scientists
The holy spirit will come down
And heal all nations together
Let's put our trust in Jehovah our God
All nations on earth will be saved.
(Only Jehovah has the Answer)

Khün ya (Temenen niungtemi Tsüngrem jak bushiba)

Asenok ajaki tekülem nung aser telok palalai sarasadem mapang iba khün ya dang tendi
(Ya tanulai ajungshiba khün lir)

MENEN KHU KALVARI NUNG TOKJANG (Burdens are lifted at calvary)

1. Temenen khu taret pener, jashia liasü;

Menen khu kalvari nung tokjang, yisu-i kümzüksü

Lep: - Menen khu kalvari nung tokjang, kalvari, kalvari,
Menen khu kalvari nung tokjang yisui kümzüker.

2. Tetsüba tejashi ajak, yisu tsüngdang tokjang;

Menen khu kalvari nung tokjang, Yisu-i kümzüksü.

3. Asen nüktzü ayimbaji kibuba-i angutsü;

Menen khu kalvari nung tokjang, Yisu-i kümzüksü.

4. Yihovah na ozü Tsüngrem, onok nü jak bushir

CORONA VIRUS tashidak ya nü züh-i shidokjang.

Lep:- Menen nisung sarasadem, anepjang, anepjang,
Menen nisung sarasadem oba nai anepjang....
Oba nai anepjang

(Atangji Tsüngrem-iang asenok anepsütetsü)

Tsübgren-i iba khen atener ajak temeshi tanüla agi semdangang.

Ken metetnura Mobile number agütsür. 9402867797

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngeru angateta agitsü mepishir**

Coronavirus ajanga America nungeri akhidang nungi tang taliba sarasadem



April 02, 2020: United States nung Coronavirus tashidak kanga bulua prokba ajanga America nungeri akhidang dang nungi tang taliba sarasadem, ta study tasen ka ajanga metetdaksü.

Coronavirus tashidak nungi jenbua alitsü aser nokdangtsü atema tangar anasai maotsü tetuyuba angaa America nung Arogo aikati Tenla kidang adenshir tekülem sentong agiba anenogo, ajisüaka iba tashidak ajanga America nunger aikati tesüiba mapang dang nungi tang taliba sarasademba survey ka ajanga bushitet.

Iba survey nungji US nung tain 11,000 dak temai shilem agia liasü, aser parnok rongnung tesadangka dang nungi tali-ibo parnoki tamalen dang nungi tang taliba sarasadem, ta telangzüba agüja liasü.

Pew Research Center-i iba survy ya March 19 nungi March 24 tsüingda agi aser iba survey

nung US nunger tain 11,537-i shilem agi. Nisung 11, 537 nungjagi shilem 55 dak temaibo coronavirus tashidak anentsü atema parnoki sarasadem ta langzü.

Anogoshia sarasadem America nunger rongnungi shilem 86-i parnoki coronavirus tashidak anentsü atema sarasadem ta langzü.

Parnok rongnungisa khenkhen dang sarasadem mesüra kodanga sarasadem masür shilem 15-ia iba tashidak prokba anentsü atema sarasademogo, ta langzü.

Ano tamangba yimsü kecha mamanger shilem 24-ia parnoki iba tashidak atema sarasademogo, ta langzü.

Association for the Study of Religion, Economics & Culture nung executive director aser University of Copenhagen nung Professor, Jeanet Sinding Bentzen-i linük 75 nung nisungtemi sarasadem indang

internet (Google) nung bushiba asadanga liasü, ajioda coronavirus agi shiranger tasen 80,000 ajungba shia sarasadem indang internet nung kanga bulua bushitepba pai asadangtet.

Bentzen-i, "Timtem mapang nung ali meimchirtemi anisüngzük aser telangzüba angutsü atema tamangba yimsü dangi meyiper. Ajioda 2020 COVID-19 tashidak mapang nunga meimchirtemi tamangba yimsü bushir," ta metetdaksü.

"Alima nung coronavirus kanga sashia prokba mapang-March ita nung nisungtemi sarasadem indang Google nung kanga bushiba ni asadangtetogo," ta paisa ashi.

Ano US nunger tain shilem 90 dak temai, coronavirus tashidak prokba sülen parnok taküm nung temelenshi lir ta ashi aser parnok rongnungisa shilem 44-i parnok libaliro kanga melenshiadokogo, ta ashi.

India nung Khristantemi sensaker nem teyari agütsüba mapang apu

April 02, 2020: Tang India linük nung coronavirus tashidak anema sashia raraba mapang ka nung India south tsütsü Tamil Nadu nung Khristantemi sensakertem nem chiyungtsü den tanga teyari oset balala agütsüba mapang nung Khristantemi kangshia tamangba yimsü meyipdaksür, ta tai tonglokja police-i apu.

Osang angazükba agi, South India nung aliba Viluppuram Arogo (Tamil Nadu) nungi pastor Perumal Kanagaraj den lanur 30 shii anasa aliba Anumandai yimdaki oa sensakertem nem chiyungtsü aser tanga teyari oset balala agütsüba mapang nung Hindu Munnani extremist telok nungi züngsem ka arua parnok dang o tamajung shia asalokja liasü.

"Hindu Munnani telok nungi züngsem kati kanga ain adoka youth missionary tem dak azük aser maneni o tamajung ashi," ta pastor, Kanagaraj-i metetdaksü.

"Kobi melii lokti tulu adenshi aser onok apu," ta paisa ashi.

Ajioda Khristantemi police dangi call asü saka Hindu nunger jagi parnoki Khristantem anema ken o agütsüadokogo, ta metetdaksü.

"Onoki nisungba dangji 'Adianu, onoki yagi aruba ya nai

mager. Ibaji kecha masü. Onoki toktsür meyipa aotsü' ta ashi. Ajisüaka pai onok amokmerena 'nenoki iba tesem toktsür ora nenok mi agi rongseta südaktsütsü' ta amokmeren," ta Kanagaraj-isa ashi.

Tesülen police-i Khristantemji puer ao.

"Police station nung parnoki Khristan yimsü atalaja jembia aser onok dak maaoktsü. Police-i ken o benokra ibaji ajanga Khristan lanurtem tarutsü jenjang raksatsü ta shia ni police dang lanurtem anemabo ken o mebenoktsü mepishi," ta pastor-isa ashi.

Rara adokdaksütsü atema Marakkanam Inspector of Police, Senthil Vinayagam-i Khristantem den ain adoka jembia. Police ketdangser jagi Khristantem dang 'nenoki iba mapa ya inyaksü melenbo nenok kinüngtsürtem ang sen aazüki yokang' ta ashi.

"Inspector jagi lanurtemji jashidaksütsü merang saka Tsüngrem taochi ajanga lanurtem mejashi aser ain madok. Hindu alia amangertemi onok anema jembidang aser police-i onok mezüngmeshidang onoki Yisu Khrista Kangki nung metaba bilemteta liasü, aser onoki

mejashi," ta pastor-i ashi. Tesülen police-i Khristantem dang, tarutsü nungbo nenoki nisungtem tamangba yimsü meyipdaksütsü memerangtsüla, ta amokmererner chioka liasü. Kanagaraj-i ashiba agi, par Arogoi küm asem tashi sensakertem nem teyari agüja arudar. Arogoi sensakertem nem jang, aben-süoshi aser torch-light agüja arur.

Tang India kübok state 29 nungi state 8 nungbo anti-conversion ozüngtem lir, aser iba ozüng nungji ajemdaker Hindu yimsü alia amangertemi Khristantem nem tiyazü nung tai tonglokja Khristantem anema inyaker.

Iba ozüng nungji ajemdaker Hindu nungeri Khristantem tekülem sentong agiba mapang nung timtem agütsür aser Khristantem amokmerener.

Taküm February ita nunga Tamil Nadu nung Thoothukudi District kübok Sathankulam jila nunga Khristantemi kangshia tamangba yimsü meyipdaksür, ta tai tonglokja police-i Khristan teku dak kanga mejungi züka liasü.

CIA World Fact Book ajanga ashiba agi India nütüng shilem 80 bo Hindu nunger lir aser Khristan nütüngbo shilem 2 dak tema dang lir.

ANOGO ABEN TSÜNGREM DEN

LAISHIBA ARTSÜ (YIHUDA 17-25)

"Ne O kü tsüng asoshi milen aser kü lenmang asoshi tesangwa lir." (T. Ken 119:115)

Tsüngremi tangatetba agütsüba rongnung mezüngbubaji Tsüngrem O lir.

Pentecost Anogo nung Tanela Temeshi alubaji Yihuda nunger otsü nung matalokdangba atalokba otsü liasü. Temaba Taktang nung atalokba angartem süngmanga liasü. "Ibai koda (?)" ta parnok rongnung asüngdangtep. "Ya kechi tetezü?" (T.M. 2:8,12). Tenyar Peteri iba indang ratetta ashi, "Saka iba indang Yoel ainakar agi ya jembio" (t.16). Iba anogo kechi atalok iba tatembangba tashiji zülua akaba Laishibaji lir. Tatalokbaji dang masü saka tenyartemi parnok sermon nung aser taküm kuli nung ibaji amshi (2 Kor. 4:13; 1 Kor. 1:31; Rom 12:19; 14:10-11; 15:2-3).

Tenyartemi aser tamangertemi iba nungi kechi angazükdaksüner ajiang: "Adianutem, kechi zülua ali iba dak alema mebenshitsü onok dak angazüktsü, aser tesayur kati ka anema mezümeküm masütsü..." (1 Kor. 4:6). Item tongtipang ozüngtem tenyartemi kong nungi angazük? Tejangja Khrista parnok kibur nungi shibai Tebui Tanela masadangi dang agütsü, "Ya zülua lir" ta latetta aliba kübok mapa inyak. Kari paji mezüja shimtetba asünung pai zülua akaba Laishiba atena oa inyaksü akok ta bilemra aji tesüngmangtsü ka asütsü. Temeimba talila Laishiba aser jungkai adokba bener marutsü kümdangang! Sayutsüngir kari Yohan 20:30 ji ain jungkai adokba ta jembir. Parnoki "Yisui iba kakat nung zülua maliba sayatenya aika inyak" ta ashiba O nung atsükoker parnok metentsü meranger. Saka item temeten O jembirtemi Yohani iba tekong sülen kechi zülü ibaji merepranger: "Saka Yisui Khrista, Tsüngrem Chir, ta nenoki amangtsü asoshi, O itemi zülur (t.31). O ka nung asenok taküm Khrista nung taküm alitsü asoshi zülua aliba O dak alema tanga tongtipang kecha mali. Kechisa zülua lir aji teperi! Lairen meyipa nung tongtipang tetuyuba kaji "Mokurai O telangtep!" Laishiba kong anener idakji anenang! "Akhi artsü teindok" (A. Shin 22:28).

Shi nisungi teti tamaren nung jangrar saka Yisu "Yashi, tanü aser teti kasa dang." Anungji tesayuba balala aser memetetba tesayuba... (Ibri 13:8-9).

Shingaia Laishibaji mesentoktet; asenok küm den kakatji tesatempa aser tarokba akümer (C.H. Spurgeon, 1834-1892).

Oba, Ne O tem angateta meimtsü tangatetba shisatsü kü nem moajang. Amen.



Thiruvananthapuram (Kerala), April 02, 2020: Brihostibarnü Kerala yimtiba, Thiruvananthapuram nung Kerala Chief Minister, Pinarayi Vijayan den ketdangsertemi Ato kilonser, Narendra Modi-i coronavirus dak sendakba nung ayongzükba video conference senden nung adenba noksa nung angur.

Tablighi Jamaat nung adener 9000 shi quarantine centres-i yok: Home Ministry

New Delhi, April 02 (Agencies): Coronavirus tashidak dak sendakba nung tang tashi nung Tablighi Jamaat züngsem aser parnok ajurur 9000 shi 'quarantine' süogo, ta Brihostibarnü home ministry nungi ketdangser kati metetdaksü. Brihostibarnü New Delhi nung osangbenertem den jembidang Union Home Ministry nung joint secretary, Punya Salila Srivastava-i, Delhi nung Tablighi Jamaat züngsem 2000 shi nungi züngsem 1,804 quarantine centres-i anir ogo aser iba tashidak temaitsü alir 334 shi hospital-i anir ogo, ta

metetdaksü. Lai ashiba agi, Ministry of Home Affairs (MHA)-i state tem den senteper Tablighi Jamaat nung inyakertem aser züngsemtem meranga bushiba ajanga iba ya inyaktet. Ano külen Health Ministry-ia, coronavirus tashidak puteter 400 shibo Tablighi Jamaat den sendaktepa lir, ta metetdaksü. Delhi Police Special Branch-ia bendanger 275 bushiteta quarantine kübok yuja lir. Bendangertemji Tablighi Jamaat senden nung adenba sülen mosque balala nung monga liasü. Ano külen taoba ita New

Delhi kübok Nizamuddin nung ayongba Tablighi Jamaat senden nung denner Nepal arrtsülen Madrassa ka nung atsüka alir Muslim nung putir 9 anema FIR ka benokogo, ta tanü police-i metetdaksü. Centre sorkari state tem dang iba mongdang nungji adenertem tekaraba nung bushitsüla, kechiyong Tablighi Jamaat nung shilem agir bendangertemi visa telatbatem alema inyakogo, ta metetdaksü. Yashi Central sorkari state tem dang visa alema inyakba atema bendangertem aser iba sentong ayongzükertem anema inyaksü tuyua liasü.

Centre-i Jan Dhan account alir shia nem ita shia sen 500 agütsütsü

New Delhi, April 02 (Agencies): Brihostibarnü Central sorkari, Jan Dhan account alir tetsür shia nem taruba ita asem tashi ita shia sen 500 agütsütsü, aser ibaji parnok indang bank account nung indang-indanga inoktsütsü, ta metetdaksüogo. Centre sorkari, ibaji ajanga linük nung Jan Dhan account alir tetsür crore 20 shi tajangzük angutsü, ta metetdaksü. Linük nung coronavirus tashidak anema raraba mapang nung sensakertem khuret pungbatsütsü atema Union Finance Minister, Nirmala Sitharaman-i sangdongba sen 1.7

lakh crore Gareeb Kalyan den Jhan Dhan ya sendaktepa lir. Centre sorkari ashiba agi, Pradhan Mantri Jan Dhan Yojana (PMJDY) scheme nung account alir shilem 53 bo tetsürtem lir. Jan Dhan account alir tetsür nem senji anogo balala nung parnok indang account number tesüsabuba (last digit) apir agütsütsü Account number tesüsabuba züngya (digit) 0 mesüra 1 alirtem nem April 3 anogo nung agütsütsü. Yamaji tesüsabuba züngya 2 mesüra 3 alirtem nem April 4 nü, züngya 4 mesüra 5 alirtem

April 7 nü, züngya 6 mesüra 7 alirtem nem April 8 nü aser tesüsabuba züngya 8 mesüra 9 alirtem nem April 9 nü agütsütsü. April 9 sülebo beneficiary temi mashie anogo nung oja senji agizüktsü akok. India nung ajak nem banking facilities agütsütsü nükjidong nung Pradhan Mantri Jan Dhan Yojana (PMJDY) ya 2014 küm August ita nung tenzüka liasü. Jan Dhan account alirtemi cheque book facility-a angutsü, ajisüaka iba atemaji account alirtemi pei account nung minimum balance ayutsüla.

Ghonda 24 tsüngda nisung 328 dak coronavirus putet; 12 süogo

New Delhi, April 02 (Agencies): Coronavirus tashidak putetba nisung 400 shibo Tablighi Jamaat senden/mongdang den sendaktepa lir, ta Brihostibarnü Health Ministry-i metetdaksü. Tanü New Delhi nung osangbenertem senden nung jembidang Health Ministry nung Joint Secretary, Lav Agrawal-i, tesüiba ghonda 24 tsüngda (Bodhbar-Brihostibar) linük nung nisung 328 dak novel coronavirus tashidak putetogo aser nisung 12 süogo, ta metetdaksü. Tang tashi nung India nung nisung 1,965 dak coronavirus tashidak puteter. Agarwal-isa, "Yashi cabinet secretary-i video conferencing ajanga state balala nungi chief secretaries aser DGPs den senden amenba mapang nung Tablighi Jamaat senden nung adenertem tekeraba nung bushitsü metetdakja liasü," ta ashi.

Tablighi Jamaat senden nung adenertem bushiba sülen iba senden nung adener 400 shi dak iba tashidak putet, ta paisa ashi. Parnok rongnung Tamil Nadu nungi nisung 173, Rajasthan nungi 11, Andaman & Nicobar Islands nungi 9, Delhi nungi 47, Puducherry nungi ana, Jammu & Kashmir nungi 22, Telengana nungi 33, Andhra Pradesh nungi 67 aser Assam nungi 16 densema lir. Samples maneni tendanga iba tashidak taliba putetdar, ta Agarwal-i ashi. Dharavi nung COVID19 dak sendakba nung pai, iba building ji shibangogo aser nisungtem maneni bushia samples bendendar, ta paisa metetdaksüogo. Joint secretary-i, Ato kilonser, Narendra Modi-i state tem dang district level tashi nung coronavirus anema raratsü mepishia metetdaksüogo, ta metetdaksü.



New Delhi, April 02, 2020: Brihostibarnü New Delhi nung Congress Tir, Sonia Gandhi leniba nung Congress Working Committee senden amenba noksa nung angur.

TN nung Covid-19 puteter 75 nungi 74 bo Nizamuddin nung adenertem lir

Chennai (Tamil Nadu), April 02 (Agencies): Tesüiba ghonda 24 tsüngda Tamil Nadu nung Covid-19 tashidak puteter nisung 75 nungi nisung 74 bo Delhi kübok Nizamuddin area nung ayongzükba Tablighi Jamaat senden/mongdang nung adenertem lir, ta Brihostibarnü osang ka ajanga metetdaksü. Coronavirus tashidak puteter 75 nungi 74 bo Delhi nung ayongzükba sentong nung adenertem lir, aser kabo parnok rongnungi ka dak menazükba liasü. Ibaji densemabo tang tashi nung state nung iba tashidak puteter ajak agi nisung 309 kümogo. Brihostibarnü Centre sorkari, Delhi nung Tablighi

Jamaat sentong nung adener tajemba agi nisung 400 dak novel coronavirus putetogo, ta metetdaksü. Taoba ita tomlen Delhi nung ayonga agiba Tablighi Jaamat senden nungji Tamil Nadu nungia nisung 1,500 shi dena liasü aser tang tashi nung nisung 1,131 bo state-i meyipa aruogo. Tamil Nadu nungi Tablighi Jamaat senden nung adener rongnung nisung 264 dak iba tashidak putetogo aser ano aika tebushidak lir. Bodhbarnüa Tamil Nadu nung novel coronavirus putetba nisung 110 pronglaji Tablighi Jamaat senden denner Tamil Nadu-i meyipa arurtem liasü. Tang India nung iba tashidak timtiba putetba tanabuba state ji Tamil Nadu kümogo.



New Delhi, April 02, 2020: Coronavirus anema linük tesem ajak shibanger aliba mapang nung Brihostibarnü New Delhi nung aliba Azadpur bazar nung nisungtemi nungdakba oset/chiyungtsü belenba noksa nung angur.

COVID-19: Spain nung asür 10,000 alemogo



Madrid, Rongchii/April 02: Madrid, Spain nung coronavirus tashidak agi shirangertem IFEMA conference centre nung khen asoshi yanglua aliba mozü kidangi bener oa anepalutsü asoshi Emergency Military Unit züngsem ka COVID-19 agi shiranger bener aliba bus ataba mapang tangokba noksa nung angur.

Rongchii/April 02, 2020

(Agencies): Brehostibarnü tashinung coronavirus agi Spain nung nisung 10,000 dak tema süogo, kong iba wara pokteter tesüba ghonda 24 tsüingda nisung 950 süa iba linük nung COVID-19 agi asür ajak agi 10,003 lir aser nisung 110,238 dak iba virus puteta lir.

United Kingdom aser United States nunga anogo ka nung iba tashidak wara agi nisung timtiba asüba osang

sangdonger lia iba osang ya anagshir.

Bodhbarnü US nung coronavirus tashidak wara agi nisung 884 asü, ta Johns Hopkins University ajanga data bendena lir. Iba linük nung nisung 213,000 dak tema iva virus yagi menepa lir.

UK nung Bodhbarnü nisung 563 asü, koba Ato Kilonser Boris Johnson-i 'tejashi anogo' ta shia liasü.

Alima ajunga nung

asandagra iba tashidak yagi nisung 938,000 dak tema menepogo aser nisung 194,400 shi taneptsü nguogo. Coronavirus tashidak yagi nisung 47,200 jungnüa taküm agiogo, koba China nung taoba küm tatemlen puteta liasü.

Iran nung coronavirus agi tesüiba ghonda 24 tsüingda nisung 124 asü aser tang iba linük nung COVID-19 agi asür ajak senteper nisung 3,136 lir, aser nisung 50,468 dak iba tashidak puteta lir, ta Iran Health Ministry odongtar Kianush Jahanpur-i ashi.

"Nisung 3,956 taküm kümzüksü tasak jenjang nung lir. Tesüiba ghonda 24 tsüingda nisung 16,711 taneptsü nguogo," ta Jahanpur-i ashi.

Alima ajunga ayimsünga prokshiba coronavirus tashidak wara yagi Belgium nung nisung 1,001 süogo, ta health ketdangsertemi ashi.

Nisung million 11.4 aliba linük, Belgium nung nisung 15,348 dak iba tashidak puteta lir.

Kasa mapang Malaysia

nung nisung 208 dak coronavirus ya puteta tang iba linük nung nisung 3,116 kümogo, koba Southeast Asia nung timtiba alitsü.

Iba linük nung nisung 50 tashi süogo aser item rongnung Brehostibarnü nisung pongu asüba dena lir.

Brehostibarnü Philippines nung COVID-19 agi nisung 322 dak iba tashidak putet.

Tang iba linük nung iba virus agi asür ajak agi 107 aser nisung 2,633 iba tashidak agi menepa lir, ta Health Secretary Francisco Duque-i ashi.

Coronavirus wara tasenba azüoktsü nükjidong nung Hokulbarnü nungi tenzüka aonung 10:00 ako nungi anepdang 4:00 ako tashi linük tesem ajungalen curfew benoktsü, ta Thailand sorkar sangdong ka ajanga metetdaksü.

Thailand nung coronavirus agi nisung 1,875 menepa lir aser nisung 15 süogo, ta Center for COVID-19 Situation Administration odongtar Taweessin Wisanuyothin-i ashi.

Russia nung anogo ka tsüingda nisung 771 dak iba tashidak puteta tang nisung

3,548 iba tashidak yagi menepa lir.

Russia nung region 80 dak tema aliba nungi region 76 nung iba tashidak agi menepa alirtem lir saka Moscow nung timba lir, kong nisung 595 dak iba tashidak jangjateta lir. Moscow nung COVID-19 agi nisung 30 süogo.

Spain nung March 12 tenzüka tang tashinung nisung 898,822 mapa inyaka aliba mali kümogo aser item ya timbaka temporary worker tem lir, ta Brehostibarnü social security data ajanga sayu.

March ita linük nung unemployed ya million 3.5 zülüok, koba 2017 küm April ita sülen tang timtiba alitsü.

Greece nung asylum bushir nisung 20 dak coronavirus putetba sülen migrant camp ka quarantine süogo, ta migration ministry ajanga ashi.

Athens northeast tsütsü kilometer 75 shi orr aliba Ritsona camp nungi anogo 14 shinga madokdaksütsü aser shinga meyoktsü, aser iba mapa police temi inyaksü, ta ministry ajanga ashi.

Arishi küm 19 tain migrant tetsür kati Athens hospital ka nung tanur asoba sülen nisung 63 dak COVID-19 putet.

Wall Street osangbener tepsetba nung aitsür temerenshi ajemtsü

Karachi, Rongchii/April 02 (Agencies): 2002 küm Wall Street osangbener Daniel Pearl pua bener oa tepsetba ken o nung aija alir British-Pakistan nung ka nem temerenshi agüja aliba Brehostibarnü Pakistan court kati melenshitsü.

Ahmed Omar Saeed Sheikh-i nisung apuba nung shilem agi, ta court ajanga nguteta temerenshi ajemtsür küm ishika tepuokdak ayutsü obendang agütsü.

Pa indang okatsür Khwaja Naveed-i ashiba agi, court telemtetba nung sorkari mashishi tashi pa tepuokdak malitsü.

"Nisung tepsetba kuli tejangia mangu, anungji tashiyim amshia nisung apuba atema küm tenet tepuokdak ayutsü obendang agütsü," ta Naveed-i osangbener dang ashi.

"Omar ya tepuokdak küm 18 liogo, anungji pa chioktsüba

totuyuba ya tanüsa agütsütsü. Pa anogo ishika tsüingda tepuodak nungi adoktsü," ta Naveed-i ashi.

Pearl tepsetba ken o nung British nung soa intetsang Sheikh densema nisung pezü aitsü, aser nisung tepsettsü tasa yangluba atema 2002 küm masü tashi tepuokdak ayutsü obendang agüja liasü.

Sindh province indang High Court nung züngsem ana agi akümba bench kati iba obendang ya Karachi yimti nung agütsü, aser kasa ken o nung tangar nisung asem taküm tepiyong tepuokdak ayutsü temerenshi agütsür yua alirtema temeden nguogo, ta Naveed-i ashi.

September 11, 2001 nung United States amakba sülen Karachi nung Pearl ya telungpur teloktem indang bushisingdangba mapang 2002 January ita pua bener ao. Hopta

ishika lir pa tepsetba indang video ka temai adoka liasü.

Iba court telemtetba anema jembitsü bilemdar, ta Sindh province nungi prosecutor kati ashi.

"Court totuyuba agütsüba sülen onoki khen jungjunga repringshitsü aser temebishiba ka benoktsü akok," ta provincial prosecutor general, Faiz Shah-i ashi.

1994 küm anüolen linüktem nungi arur raliwalirtem apuba ken o dak sendakba nung Sheikh ya India nung 1990s nung apu.

1999 küm tatemlen Indian airline ka anüing tom nung lia tashiyim agi rakzükraitema Afghanistan-i anir aoba sülen apur nisung asem India nung tepuokdak nungi chioker rongnung pa liasü. Iba mapang Taliban teloki Afghanistan nung yimsü süa liasü aser parnok teyari ajanga item nisungtem ya pua India nem agütsü.

North Korea nung coronavirus mali

Seoul, Rongchii/April 02 (Agencies): Alima nung coronavirus tashidak agi nisung million ka jungnüa menepa aliba mapang North Korea nungbo iba virus agi shinga menepa mali, ta Pyongyang nung health ketdangser kati ashi.

China nung iba virus mezüing putetba sülen January ita North Korea-i arrtsü shebang aser iba tashidak wara nungi jenbua alitsü asoshi mera teashi agi.

Linük nung iba maparen takon ngua inyakdar, ta North Korea indang Central Emergency Anti-epidemic Headquarters nung anti-epidemic department director Pak Myong Su-i nenshia ashi.

"Tang tashi ozü linük nung novel coronavirus agi nisung ka danga menepa mali. Ozü linüki aiter ajak quarantine asütsü atema scientific measure jelia agiogo aser osettsüset ajak kanga junga müreka mesen indoker aser arrtsü shibanga tzü aser tayimtsü lenmang ajunga shibangogo," ta Pak-i ashi.

Linük ajaknung amai coronavirus tashidak puteta lir, aser alima nung million ka jungnüa iba tashidak yagi menepogo, ta World Health Organization ajanga Bodhbarnü ashi.

China yutsür South Korea nunga iba tashidak mezüing poktetdang kanga sashia kongshi, koba agi alima nung nisung 45,000 dak tema taküm agiogo.

Iba virus yagi North Korea

kanga mela menepa aotsü, kechiaser iba linük nung medical system kanga tashi mait, ta mongintemi ashir aser Pyongyang-i iba wara miimbanga ayur, ta iba linük nungi jena adokertemi aitsür.

South Korea nung alir US mitkar tanishir General Robert Abrams-ia taoba ita, North nung iba virus putetba ni meteta lir, ta shia liasü.

US Tir Donald Trump-ia, North Korea nung langk kar ataloker, ta ashi aser iba wara anema nokdakba nung yariteptsü mulunga lir, ta North Korea lenir Kim Jong Un dangi shidi züluba nung shia lir.

North Korea-i nuclear aser ballistic missile amshiba ajanga international sanction aika agüja lir aser parnokti iba virus dak sendakba teyari meshiogo.

February ita Russia indang foreign ministry-ia, Pyongyang-i meshiba ama par nem coronavirus putetba oset 1,500 agütsüogo, ta shia liasü.

Doctors without Borders aser UNICEF ajanga North Korea nem iba tashidak putetba oset, face mask, protective equipment aser disinfectant tem agütsütsü asoshi United Nations-i tenokdangba agüja aliba kar agien.

Pyongyang nung coronavirus tashidak anema raraba nung yariteptsü asoshi World Health Organisation ajanga sen \$900,000 indoktsü sentong lir, ta UN Office for the Coordination of Humanitarian Affairs website nung shia lir.



Kabul, Rongchii/April 2 : Chinese Ambassador Wang Yu (abelen tanabuba) ajanga Kabul, Afghanistan nung April 2, 2020 nü Afghanistan indang second vice president, Mohammad Sarwar Danish nem medical supplies amoktsüba noksa ka yangi angur. Brehostibarnü China-i item teyari agütsüba mapang, novel coronavirus den raratsü asoshi China aser Afghan nüburttem külemi nokdaka lir, ta Chinese Ambassador to Afghanistan, Wang Yu-i ashi.



Kohima, Rongchii/April 02, 2020: Naga Hospital Authority, Kohima NHAK, Kohima nung April 2, 2020 nü NHAK-i COVID-19 dak sendakba nung renemshiba asadangtsü asoshi senden ka agiba mapang Advisor Dr. Nicky Kire den DTF züngsemtem külemi tangokba noksa ka yangi angur.

Mokokchung Police tekolakbai mepishir



Mkg. April 02 (TYO) : Tang agi joko hopta ka dak tali Nagaland nung dang masü saka linük ajaklen Coronavirus tashidak wara tamajung nungi jenbua alitsü atema nünbortem shinga kima yimdong nung mesenzütsü ozüing agüja aliba mapang ka nung, Mokokchung nung Superintendent of Police, Wabong Vishal IPS-i Ao oshi nung social media ajanga nünbortem dang ano maneni

government-i tetuyuba agüja aliba nung tashi angaa anidaksü mepishia metetdaksüogo.

"Tang tashi nünbortemi tashidak wara nungi jenbua alitsü asoshi government-i teyuba nung tashi angaa anidakdagi, saka ano Covid 19 ta ajaba tashidak mesamai lir, anungji Mokokchung nung aliba nünbortem kimai mayazüktsü ajungshir," ta Mokokchung SP, Wb. Vishal-isa Ao oshi nung

kanga mepishia metetdaksü.

Iba tashidak nungi jenbua alitsü asoshi nokdakba tongpang ya tulu lir aser Mokokchung nunga police-temi pei taküm aser kibong ajak bendanga agüja inyakdagi, anungji nünbortemi, koda masüba nüngdak tulu melira, tashi angaa kima mayazüki kilong nung dang lia atabaji policetem mapa nung yariseemer asütsü ta paisa ashi.

Iba tashidak nungi jenbutsi asoshi tanga lenmang aika mali saka teni tebang nembanga mask enoktsü aser kima yimdong nung nisungtem ajurua mesenzüi pilaa alitsüba dang lir ta Mokokchung SP-isa nünbortem meima angatetdaksüba agi Ao oshi nung youtube, facebook aser whatsapp ajanga nenshia metetdaksüogo.

Dr. Vizolie-i Mon, Longleng aser Tuensang semdang

Dimapur, Rongchii/April 2 (TYO): COVID-19 tashidak prokshia meyoktsü asoshi renemshia aliba asadangtsü asoshi Directorate ketdangser telok ka den Principal Director, Dept. of Health & Family Welfare, Dr. Vizolie Z Soukhrie-i April 2 nü Mon, Longleng aser Tuensang district semdangogo. District asemprongla nung Deputy Commissioner aser Superintendent of Police matsüngdang District Medical ketdangsertem den Principal

Director senden menogo.

Parnok den sensaksemba mapang, district nung health workers atema aria bilemba aser COVID-19 dak sendakba inyakyim nung yakbangser inyakba DC aser SP tem aliba ya district tem atema kanga tia taka, ta Dr. Vizolie-i ashi. Paisa, health personnel ka ama asenoki taoba mapang nunga iba amala tensa ajangshidangogo ta shia tang iba tensa nunga tasü ita inyaktü ajungshi.

District tem nung

tenüngsang agütsütsü langa mapatem inyaker aliba atema pai tenüngsang agütsü. Pai, health facility tem nung tashidak nungi jenboa alitsü asoshi jenjang agibattem bentshitsu aser nünbortem dang merekmeja alitsü ajungshitsu ashi. Dr. Vizolie-isa, district tem nung tangazükba shidak agütsütsü aser inyakyim kanga kümdanga meita atatsü mepeshiba den district asemprongla nung nünbortemi shilem tajung agiba atema pelaba lemsatep.

New Pangsha nung mask tem lema agütsü

Dimapur, Rongchii/April 02, 2020 (TYO): Alima ajunga asüngba COVID-19 wara nungi kümzüka aser jenbua alitsü mechi, New Pangsha village kübok check post nung tangar maidaktsütsü aser yimertem-a metokodaktsütsü atema mita atar Village Guards aser Council züngsemtem nem Wolam Nyukyan (New Pangsha) Students' Union-i parnok sasa yangluba mask tem

April 02, 2020 (Brehostibar) nü lema agüja liasü, ta sangdong ka ajanga metetdaksü.

Iba mapang Wolam Nyukyan (New Pangsha) Students' Union president, P. Nyukshing Lam-i COVID-19 dak sendakba nung tekümdangtsü lemsatep aser iba den külemi nünbur ajungtsü atema inyakdang tamasa pei temang merüka yua anepalutsü asoshi metetdakja liasü.

Tang linük tesem ajunga anogo 21 tashi lockdown asütsü sangdongba den külemi COVID -19 azüoktsü asoshi India sorkar kübok tim ketdangsertemi nünbortem mesenzüdaktsütsü sashia mitba mapang, Indo-Myanmar arrtsülen-a arrtsü alema nisung aittsü mesüra tokutsü asoshi tenokdangba tesashi agütsür lir, ta kasa sangdong ajanga metetdaksü.



Mokokchung district administration aser ward yimden ajak den tangatetep nung Mokokchung Town Lanur Telungjem (MTLT)-i Mokokchung town kübok Ward ajak nung koda masür timtemer nem jang (rice), dal, totzü, maida aser atta terara seper lema agütsütsü apusotsü mapang tangokba noksa nung angur. Noksa nung Mokokchung ADC & MMC Administrator W. Manpai Phom den , Ao Senden, Mokokchung Chamber of Commerce & Industries (MCCI), Watsü Mungdang aser MTLT ketdangsurtema angur. Mokokchung, April 2, 2020.

GOVERNMENT OF NAGALAND DIRECTORATE OF TECHNICAL EDUCATION

NAGALAND: KOHIMA-797004

NO. DTE/ESTT-2/12/2018-19/

Dt. Kohima, the 2nd April. 2020.

NOTIFICATION

This is to inform all the indenting candidate who want to apply for Nagaland State Entrance Examination (NSEE-2020) that the last date for submission of forms same by hand is hereby extended to 30th April, 2020.

The prescribed application form can be also collected from the office of the undersigned during working hours as notified earlier and the same can also be downloaded from the Department website: www.dtenagaland.org.in

(Er. Arjun Singh)
Director



Core Team on Essential Commodities Covid-19 Mokokchung District (CTECCMD) züngsemtem Imlong Place Mokokchung nung mazüngi mapa inyakba mapang tangokba noksa nung angur. Iba telok ajanga Mokokchung town nung nungdakba chiyungtsütem ali mali itemji repringshimer dang tanga district kar densema Mokokchung district kübok town, yimtsüing aser ward balala dangi temelaba agüja bener yoker. Tang ya linük ajak shibangba mapang ka asünung nungdakba chiyungtsütem anüngakong masütsü Mokokchung, April 2, 2020.

Kohima DC-i sangdonger

Kohima, Rongchii/April 02, 2020 (TYO): Kohima Relief Distribution Center, Local Ground nung April 1 aser 2, 2020 nü chairman temi pei ward/colony tenüing agütsüba ama, nüngdakba jang-o-tzü tem ward aser colony balala atema lema agütsüogo, ta Kohima Deputy Commissioner Gregory Thejawelie NCS-i metetdaksü.

Iba dak sendakba nung, ward aser colony shia nung nubür tsüingda kati ka dak khenyongi mekongshitepi item jang-o-tzü tim nung lema agütsütsü asoshi Kohima District kübok Outpost Officers, Sector Magistrates, Ward aser

colony chairmen tem dang repringshima achayangtsü asoshi DC-i metetdaksü.

Maneni, Kohima district kübok shi alepba dokan ajak dang Kohima Municipal Council ajanga tuyuba ama, shi ajak shi alepdak masü saka shileper temi tsüingdong oa shi taginür ki tongtsütsü (Home Delivery) asoshi DC-isa metetdaksüogo.

Osang tejangja ka magütsü tashi Kohima kübok shi alepba dokan lapokba aser shi alepba dokan ajanga shi lepa ayokbatem nokdangar ta Kohima Municipal Council-i tuyuba nunga metetdakja lir, ta DC-i metetdaksü.

Kohima Press Club (KPC)-i asükhu lemsatep

Dimapur, Rongchii/April 2 (TYO): Kohima Press Club tir Alice Yhoshü tebu Sholo Thong shiranga lir April 1 nü dimapur nung asüba osang ajangazüka KPC-i mang ayimer.

Nübu iba lima nungi pilaa aoba ajanga tejashi aser temulungzürep tia nung na aliba onoki angateter, ajüsüaka iba amala tejashi taia ka nung aliba mapanga pa shisatsü, sorkar mapa khuret bona tenzüka aser taküm aliba mapang lokti maparen ochishia aser bendanga agüja inyakba repringtetsü merangang.

Mangyim jashi tia nung aliba mapang ner kibong nem teyanglur Tsüingremi anisüingzüik agüjang aser tsürabur tanüla tesünep nung anisüingzükdakjang ta KPC-i sarasademtsür. Maneni nai inyakba ajak nung nübu temeim aser tawabangba metettsü aser pa shisa taka o tem ajanga na anitsü aser pai toktsür aoba tajangshiba balala ajanga tashi aser taneptsüba angutsü sarasademja atar, ta KPC General Secretary Atono Tsükrü Kense-i sangdong ka ajanga metetdaksü.

US Open August 31 nü tenzüksü Boateng dang Bayern-i senchi achi



New York, Rongchii/April 2 (Agencies): US Open ayongertemi August 31 nungi tenzüksü New York nung iba asayamung asayatsü sentong lir, ta US Tennis Association-i Bodhbarnü metetdaksü.

National Tennis center nung indoor court tem makeshift coronavirus hospital facility kümdaksür aliba mapang ka nung US Tennis Association-i ashiba agi, parnoki tensa asadanga alitsü aser sentongtem yanglshitsü.

"USTA-i renema aliba ama

US Open ayongzüksü asayatsü sentong lir aser onoki maneni iba asayamung ayonga asayatsü sentong yangludat," ta USTA-i ashi.

"COVID-19 tashidak pokteter aliba ajanga tensa kanga kara melenshia aoba USTA-i kanga kümdang asadangdar aser kechi atalokdir atalokaka item ajak asoshi renemdar," ta parnokisa ashi.

America nung iba tashidak agi New York kanga mejungi kongshir lir aser tennis court tem mozüki kümdaksüogo aser


Louis Armstrong Stadium ya shirangertem, volunteers aser iba tesem temeket nung aliba kaketshirtem chiyongba tesem ka kümdaksüogo.

Kasa mapang nung taruba jenjang agitsü asoshi USTA-i health experts tem nungi shisatsü agidar.

"Tensa tajungba angatetsü asoshi onok USTA indang medical advisory group aser sorkar o security ketdangsertem dak metaloker lir.

"US open dak sendakba nung telemtetba ajak ya asayartem, fan tem aser asayamung dak sendaka alirtem ajak health aser tanga tenüngdakbatem temulungdang yur USTA-i agitsü," ta parnokisa metetdaksü.

US Open ya August 31 nungi September 31 tashi Flushing Meadows hardcourts nung asayatsü sentong lir.



Jerome Boateng

Paris, Rongchii/April 2 (Agencies): Bayern Munich-i defender Jerome Boateng dang temelaba magi yimti toktsür aoba atema senchi achi, koba coronavirus tashidak pokteter aliba ajanga tenokdangba agütsür aliba anema inyakba ka liasü.

TVO television sangdong ka ajanga ashiba agi, Mongolbarnü par jabaso gari lendong ka nung dena tera yiruba semdangtsü asoshi arishi küm 31 tain asayar

ya yimti toktsür ao.

"Bayern defender Jerome Boateng-i club dang nungi temelaba magi-i yashi Munich toktsür ao," ta club sangdong ka ajanga metetdaksü.

"Club-i tetuyuba agütsür aliba sülen Boateng-i manidak.

"Iba tetuyuba ajanga FC Bayern asayartem azüoker, koba tang tensa apir sorkari senzusenpong masütsü asoshi aser health authorities-i tetuyuba agütsür aliba dak ajemdaker agütsüogo," ta kasa sangdong ajanga metetdaksü.

Bayern puri pa dang sen kwi senchi achi ajibo mashi saka iba sen ya local mozüki ka nem tenla agütsütsü.

"Club nem osang magütsüba atema ni aibelenogo saka iba mapang nung ni ozü jabaso atema dang bilema liasü," ta Boateng-i Bild newspaper dang ashi.

"Pa temang mejungi liasü. Tanuri tebu jara koba mapang nung südir süaka ni aotsü," ta paisa ashi.

UEFA-i Champions & Europa League asaya thinener

Rongchii/April 2, 2020 (Agencies): Coronavirus tashidak pokteter aliba ajanga UEFA-i Bodhbarnü Champions League aser Europa League football asaya ajak osang tejangja ka magütsü tashi thinena atatsü telemtetba agiogo.

European soccer's governing body-isa, June ita national team asayatem ajak thinenogo aser iba nung Euro 2020 playoff asayatem densema lir, koba 2021 nung asayatsü telemtetba agiogo.

Champions League, second-tier Europa League aser tetsür Champions League final asaya ajak May ita asayatsü liasü saka item

asayatem ajak thinenogo.

Tenokdangba agütsür aliba aginba sülen Europe nung domestic seasons timba ka tembangtsü imlaa aliba mapang ka nung UEFA tir Aleksander Ceferin-i taoba hopta ashiba agi, June tatemi metenzükteetra season tembanga masayatetsü.

Bodhbarnü UEFA züngsem 55 video conference ajanga senden amenba mapang, tang timtem nung aliba indang asadangogo aser taruba hoptatem nung asaya koma asütsü iba indanga sensaksesemogo.

Senden nung shilem agir source kati ashiba agi, tashidak kobika tsüngda azüoktettsü

ibaji mejangjaba ajanga telemtetba kecha magi saka kobika monodir yamaji domestic season tembangtsü asoshi tebilemstü adoktsü.

Asayamung tembangtsü asoshi kanga menoadokra European club competitions ya mini-tournament ka kümdakja 'final four' dang asayatsü akok.

UEFA executive committee-isa, taruba season atema club licensing paperwork inyakyim asoshi mapang tali agütsütsü telemtetba agiogo aser club temi parnok rongseketsü jenjang indang osang tejangja agütsütsü asoshi tuyur aliba agütsü lemtetogo.

Wimbledon athiba atema Federer mepelar


London, Rongchii/April 2 (Agencies): Corona virus tashidak pokteter aliba ajanga alima rara tanabuba sülen tang mezüngbuba Wimbledon asayamung athiba osang angazüksü kanga mepelar ta Roger Federer-i ashi.

Tashidak tamajung pokteter aliba ajanga maneni alima mesüngjemtetba apir Wimbledon asayamung ayongertemi alima nung Grand Slam asayamung tejentiba ya athitsü asoshi Bodhbarnü telemtetba agi.

Federer shibai iba asayamung ti ben koka otsü tasen yanglur lir, pai Twitter nung "devastated" ta shia ojang ka agi iba asayamung athiba indang pa tebilemba lemsatet.

Serena Williams-ia iba osang angazüksü la aoksaba Twitter ajanga lemsatetepogo. Lai iba asayamung tenetben tashi koker lir.

2021 küm iba asayamung asayaba mapang nungbo Federer aser Serena naprongla



arishi küm 40 tajunger dang alitsü.

Wimbledon ya June 29 nungi tenzüksü hopta ana asayatsü liasü aser Novak Djokovic o Simona Halep nati tena indang kija asaya title defend asütsü renema liasü.

Ajisüaka alima ajanga nung tashidak pokteta timtem adoker aliba mapang ka nung All England Club ketdangsertemi iba asayamung thitsütsüsa kümogo.

Halep shibai taoba küm

mezüngbuba Wimbledon final nung Serena koka liasü, laia Twitter ajanga: "Taküm Wimbledon masayatsüba osang angazüksü mepelar," ta ashi.

"Taoba küm final asayaba anogo ya ni asoshi teti atema tepelatiba anogo ka asütsü, saka asenok tang tennis dang nungi tuluba jenjang ka ajanga odar aser Wimbledon bo tanaben asayatetsü. Iba tetezü kü title defend asütsü asoshi mapang talangba atatsüsa akümtsü," ta lai ashi.

UFC 249 nung Khabib masayatsü



Los Angeles, Rongchii/April 2 (Agencies): Mixed martial arts asayar Khabib Nurmagomedov-i, April 18 nü asayatsü aliba UFC asaya nung pa shilem magütsü, kechiyong coronavirus pokteter aliba mapang ka nung pa senzusenpongtsü asoshi renema mali, ta ashi.

Lightweight champion Nurmagomedov ya UFC 249 nung Tony Ferguson den asayatsü liasü, saka Instagram nung pai pa iba asaya asoshi Russia toktsür aotsü atema memulunger ta shiogo.

"Ni ajak angateter aser iba asaya athiba atema nenok dang nungi ni tejashiba, asaya sülen sentong aika yanglur liasü saka ni iba ya ajakbo mazioktettsü," ta Nurmagomedov-i zülutsü.

COVID-19 tashidak prokshia meyoktsü asoshi tesem balala nung tenokdangba agütsür aliba ajanga asayadak tesem monguteti Ultimate

Fighting Championship asayamung asembo thinenogo. UFC-i Khabib aser Ferguson na kong asayatsü iba indang osang magütsü, saka tir Dana White-i iba asaya atalokdaksütsü asoshi pa mulungteter lir ta shiogo.

Osang ajanga ashiba agi, iba asaya terpranger medeni asayatsü asoshi imlar.

White-i toba hopta ashiba agi, pai iba asaya methi-i asayaner aser US nung saisapong kecha masayaa aliba tenzüksühidaksüner, koba coronavirus pokteter aliba ajanga bangdaka lir.

"Ni April 18 nü Tony aser Khabib na asaya atalokdaksüner aser linük nung saisapong tanaben tenzüksühidaksüner," ta White-i ashi.

"Tang tesem pezü pongu ka asadangdar aser yakta tenangzüktepa ka yanglutsü," ta paisa ashi.

BILEMDANGANG

"Tetuyuba sülen manidaktetertemji shiruru jenjangia maittsü."